



6. oktoberi 2016

UKA2016/34

Neriniartitsivinni neriniartitsinerup naatitanut nungusaataangitsumik ingerlanneqarsinnaanera pillugu Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut. Misissuinermi ullumikkut uumasuutinut neriniartitsiviusut nunaminertallu taakkua qanittuaniittut ilanngullugit nalilersorneqassapput uumasut qassit naasoqassutsip nammassinnaaneraa, taamaalilluni piffissaq sivisunerusoq eqqarsaatigalugu tunisassiorsinnaaneq pitsaanerpaaq qulakkeerumallugu. Misissuinermi inerniliusaaq UPA-2018-imi saqqummiunneqassaaq.
(Inatsisartunut ilaasortaq Suka K. Frederiksen, Siumut)

Inatsisartunut ilaasortaq Suka K Frederiksen Siumut aalajangiiffigisassatut siunnersuuteqarpoq, tassalu uumasuuteqarfinni neriniartitsinerup misissuisoqarnissaanik tamannalu oqaaseqarfigissavarput.

Nunatsinni uumasuuteqarnikkut imminut neqissaqarniarnikkullu napatinnerulernissarput, uagutsinnullu pilersornerulernissarput sutigut tamatigut anguniartuartariaqarparput nuna naalagaaffinngorniartoq sapinngisamik nunap namminneq aammalu inumminik pilersitaasunik amerlanerpaanik isumalluuteqartariaqarmat.

Nersutaateqarnermik inuussutissarsiuteqarnek nunatta kujataani atuutilersimavoq kinguariinnik ilaqutariinnillu ingerlanneqalersimasoq inuussutissarsiutinngorsimasorlu.

Nunatsinni uumasuuteqarnikkut tassalu savaateqarnikkut tuttuuteqarnikkut nersussuaateqarnikkut aammalu ilaatigut histiuteqarnermi misilittakkat nunatta kujataani misilittagaqarfigilluarneqarput. Tamakkulu uumasuutigineqartut isumannaatsumik ingerlassappata, uumasuuteqartunik misilittagaqarfigineqalersimasut aamma atorluarlugit misissuilluarnikkut qanoq isumannaatsumik uumasunut uumasutilinnullu ingerlariaqqinnissamat qanoq aaqqissuussisoqassanersoq qulakkeerniarlugu suliniartoqartariaqartoq isumaqarpugut.

Nunalerineq siunissami nersutaateqarnikkut isumannaatsumik illersorneqarsinnaasumik ingerlassappat taava neriniartitsinikkut pissutsit qulaajaqqissaartariaqarput.

Nersutaateqarnek ukiorpassuarni inuussutissarsiutigineqarsinnaanngorlugu eqqunneqarnikuuvoq, taamaattumik aamma aningaasalersuinikkut piorsaanerit ingerlassappata taava uumasunut neriniartitsiviit qularnaatsumik misissuiffigineqartariaqarput. Aammalu nioqqtissiornikkut nunalerinermut tunngasut inuppassuarnik suliffigineqalersimapput taamaattumik pilersaarusiornissat pisariaqartippagut aamma suliffissat tassani pineqarmata,

Kujataani ilaatigut oqaatigineqartarpoq tuttu uumasuutigineqartut ilaatigut imak amerlatigilersimasut allaat neriarfissat amigaataalerlutik soorunami tamanna ilumoornerisoq uagut akisinnaanngilarput kisiannili taamatut apuussisarnerit naammattoortalernikuuagut. Taamattumik uumasut tassalu tuttu isumannaatsumik neriniarfissaqassappata nakkutilliinikkut ingerlasoqarnissaa kissaatigaarput uumasummi aamma uumaffimmini illersorneqarnissaat pisariaqarmat.

Uani siunnersuummi qulakkeerniarneqartoq tassaavoq siunissami uumasunut nersutaateqarnissamullu inuussutissarsiuteqarnissamut isumannaatsumik ingerlasoqarnissaanut tunngavissat pitsaanerpaajunissaat.

Taamaakkaluartoq assut ajuusarnarpoq una siunnersuut soqutiginartoq eqqarsaatigilluarnagu Naalakkersuisunit itigartinneqarmat. Tamannalu uniffiginagu Partii Naleqqamiit aalisarnermut nunalerinermullu ataatsimiititaliami suliarineqarnissaa innersuussutigaarput.

Hans Enoksen